


TEZAUUR LITURGIC

24 AUGUST

**SLUJBA
SF. IERARH-MUCENIC
PROCOPIE
TITOV,
ARHIEPISCOPUL
CHERSONULUI**



MOSCOVA, 2000



Служба священномученику Прокопию, Архиепископу Херсонскому

НА ВЕЛИЦЕЙ ВЕЧЕРНИ Стихиры, гл.6

Прехвальнии новомученицы и исповедницы
Руссии, / восхваляем вы с любовью, / вас бо не
потопила вода безверия, / ни буря ярости
беззакония, / ни ветры ересей погибельных, / но
Духом Святым просвещеннии, / яко жертвы
непорочныя Царю Славы принесостесь. / Емуже
молитесь о душах наших.

Прокопие священномучениче, / в лике
новомученик прославленный, / гласом
немолчным паству наставляя еси, / от волков
хищных и наемник лукавых защищал еси, /
душу твою полагая за овцы, яко пастырь
добрый. / И ныне Христу молися, / даровати
душам нашим мир и велию милость.

Всехвальне Прокопие новомучениче, / за чистоту
души твоея, / увенча тя Владыка венцем славы
вечныя, / прияв твоя страдания и смерть, / яко
жертву всесовершенну. / Темже и во светлостех
небесных ныне ликовствуеши, / Христу
молящися, / о спасении тя призывающих.

Слава, глас 4:

Отрасле благочестиваго рода, / Дарами Святаго
Духа преизобильно украшенный, / служителю
Христов Прокопие, / на ниве Господней
потрудился еси, / плод сторицею во ученицех
принесл еси. / Ты бо молитвою недуги душевныя
и телесныя исцелял еси, / Прокопие,
исповедниче, / и богодухновенными возгремел
еси глаголы / сораспятися призывая Христу, / и
яве образ тебе самага предлагая.

И ныне, Богородичен, глас тойже:

Иже Тебе ради богоотец пророк Давид /
песненно о Тебе провозгласи, величия тебе
Сотворшему: / предста Царица одесную Тебе. /
Тя бо Матерь, Ходатаицу живота показа, / без
отца из Тебе вочеловечится Благоволивый Бог:
/ да Свой паки обновит образ, истлевший
страстьми, / и заблуждшее горохищное обрет
овча, / на рамо восприим, к Отцу принесет, / и
Своему хотению, / с Небесными соединит
Силами, / и спасет, Богородице, / мир, Христос
имеяй велию и богатую милость.

Вход.	Прокимен	дне.	И	чтения	3:
Деян.		Зач.			10;
Деян.		Зач.			11;
Деян.	Зач.	12.			

На литии стихирь, глас 1:

Прокопия священномученика, / приидите
вернии вси почтим, / пеньми и песньми
духовными, / сей бо мужеством препоясая, /
исповедник был еси крепок; / и мучения венец
светел восприим благодатию, / Христа прославил
еси.

Цвете еси прекрасный, Прокопие богомудре, /
ты бо храмы душевныя чад своих созидая; / егда
же время приспе, душу твою за овцы положил
еси, / яко пастырь добрый и исповедник, кровь
твою честную за Христа изливал еси; / темже от
Вседержителевы руки подвигов почестъ прияв, /
украсился еси неувядаемаго цвета сиянием.

Слава: глас 8:

В небесный вшед Чертог / багряницею
украшен, / и Троице с велиим сонмом
новомучеников и исповедников ныне
предстоиши, / Прокопие многострадальне, / мы
же днесъ, память твою светоносную
совершающе, / прославльшаго тя Господа
величаем.

И ныне, Богородичен, глас тойже:

Приидите, людие, / ублажим Заступницу
усердную рода христианскаго, / се бо предстоит
Престолу Царя славы / и со слезами молит о
земнем уделе Своем, / с Неюже вкупе и собори

святых новомучеников вопиют немолчно: /
Владыко Христе, спасе землю Русскую.

На стиховне, глас 4:

Исповедник и священномученик явился еси, /
Прокопие славне, / во изгнании и темнице
паству твою наставляя еси, / и мучением сияя,
ангелом уподобился еси. / Темже ты чтим и
любовию празднуем / светоносную память твою.

Стих: *Праведник яко финикс процветет, яко кедр, иже в Ливане, умножится.*

Православныя веры ревнителю, / богословия
догматов и святоотеческаго учения
проповедниче и исполнителю, / и Божественныя
службы пламенный служителю, / плоды трудов
твоих Христу принесл еси, / Емуже и до смерти
последовал еси. / Егоже ныне зриши в сиянии
славы вечныя, / священномучениче Прокопие.

Стих: *Насаждения в дому Господни, во дворех
Бога нашего процветут.*

Не скорбети, но радоватися повелел еси чадам
твоим, / Прокопие блаженне, / егда призва ты
Господь последовати Ему страданием; / аще
гоним и истязуем бе, / всего себе в руце
Владычни предай, / телесныя раны
превозмогая / силою вседетельною Духа.

Слава, глас 8:

Кровию обагрив твою священную одежду,/ вшел еси во Святая Святых,/ свят быв, Прокопие славне,/ мужественно страдания и смерть за Христа приял еси,/ леть и неистовство богоборческое поправше,/ врага победил еси;/ темже молим тя:/ укрепи молитвами твоими души наша.

И ныне, Богородичен, глас тойже:

Призри на моления Твоих раб, Всенепорочная,/ и всякия скорби избави землю Русскую,/ дом Твой нареченную/ и кровью новомученик освященную./ Да не постыдимся, Владычице Державная,/ Тя призывающии,/ Ты бо еси православных помощь,/ радость и покров/ и спасение душ наших.

Тропарь, глас 1

Светильник всесветлый во граде Херсоне явился еси,/ пастырю добрый, священномучениче Прокопие./ Любовь и милосердие в сердцах верных насаждая,/ твердо стояти во исповедании веры Православныя призывал еси./ Темже со пресвитером Иоанном за Христа пострадал еси,/ и ныне купно с ним на небеси престолу Божию предстоя,/ моли Милостиваго Бога/ отечество наше в Православии и благочестии утвердити,/

мир Церкви даровати/ и душам нашим велию милость.

НА УТРЕНИ

По первом стихословии седален, глас 6:

Отвергнувся себе, ярем делания пастырского мужественно подъял еси, не убоявся прещения власти богоборческаго, чадолюбиве отче и исповедниче Христов; ни гонения бо, ни темница не возможе отлучити тя от служения сего.

Слава и ныне, Богородичен:

О Всепетая Дево, Тя ве мы Покров земли Русския, Тебе бо, грешнии, има мы предстательство, Тебе стяжахом в напастех спасение, Едину Всенепорочную.

По втором стихословии, седален, глас 2:

О благолепии храма и Божественныя службы благоговейнаго совершения ревнуя, наставник и учитель благославный многих явился еси, Прокопие достохвальне, к познанию неизреченныя сладости жизни вечныя возводя послушная чада твоя.

Слава и ныне, Богородичен, глас 2:

Молитвеннице Теплая, Заступнице рода христианскаго,/ прими моления раб Твоих/ и

осени Русь Православную покровом Твоея
благости.

По полиелеи седален, глас 2:

Светло торжествующе празднуем память твою,/ /
отче Прокопие священномучениче,/ / и верою
исполняемся,/ / яко не оставляеши паствы твоея
своим попечением;/ / предстояще незримо со
Ангелы и всеми святыми,/ / моление сие
приемлещи,/ / предстательствуя о спасении
поющих тя.

Слава и ныне, Богородичен, глас 2:

Молитвеннице Теплая, Заступнице рода
христианскаго,/ / прими моления раб Твоих/ / и
осени Русь Православную покровом Твоея
благости.

Прокимен, глас 4:

Проидохом сквозе огонь и воду,/ / и извел еси ны в
покой.

Стих: Разжегл ны еси, якоже разжизается
сребро.

Всякое

дыхание:

Евангелие от Матфея, зачало 36.

По 50-м псалме стихира, глас 6:

Сосуд священ Духа Святаго ты был еси,/ / от
корене праведнаго плод совершен,/ / Прокопие
священномучениче,/ / чада твоя любовию

Христовою возлюбил еси, / и за тех душу свою положил еси, взывая: / Господи, ихже дал еси мне, сохранил еси, / да не погибнут.

КАНОН СВЯТАГО, глас 2

Песнь 1

Ирмос: Грядите людие:

Престолу ныне предстоя Христову, яко архиерей и мученик преславный, Прокопие всечестне, приими молитвы наша с любовью тебе возсылаемыя.

Плод благославлен древа праведнаго прозябл еси, избранниче Божий, от источника святости отеческия питаемь, подвигом исповедническим достойно трапезе райския принеслся еси. Дар Богу, всеблаженне, себе самага принесл еси, житием многотрудным и честным страданием, священномучениче Прокопие.

Богородичен: Бога без семени рождшая, паче ума человека, Дево Пречистая и Мати; Егоже моли помиловати поющих Тя.

Песнь 3

Ирмос: Утверди нас в Тебе Господи:

Миром помазания духовнаго украшен, Прокопие славне, добре священствовал еси, жезлом веры

отгоняя ересей ловитвы и сохраняя стадо словесное от волков губящих е.

Ночь отгнал еси суетства, богоглаголиве отче, блистании премудраго проповедания, и верных мысли просветил еси.

Возносимую презрел еси зиму безбожия, возлюбив учения святых отец догматы, теплотою Божественнаго Духа невредино сердца чад твоих соблюл еси.

Богородичен: Утверждение буди и прибежище, и покров Дево Пречистая, верою к Тебе прибегающим, и любовью воспевающих Рождшагося из Тебе.

Седален, глас 3:

В незлобии Христу подражавый, истязания и раны от безбожных лютых кротко претерпел еси, Стефана первомученика гласом моляся за обидящих тя, Прокопие многострадальне.

Слава, и ныне, Богородичен, глас 3:

Не имамы инаго прибежища, разве Тебе, Богородице, / Отчества нашего усердная Заступнице: / всяк бо, почитаяй Тя, надежду обретает.

Песнь 4

**Ирмос: Услышах, Господи, славное Твое
смотрение:**

Паству твою премудро наставляя, богословия
поборник явился еси, священнодейственне
путеводящъ добродетельных, Прокопие, деяний.

Тайны горняго мира чрез участие в
богослужении познавати учил еси, богомудре
отче, прилеплятися же всем сердцем небесным
покровителем нашим и тем приуготовитися
вечности.

Утеснил еси нечестие, святче, пространством
истиннаго благочестия, и пути в сие ведущия,
показал еси, спасая души, потопляемья
прелести богоборчества водами.

Богородичен: Просвети, Пречистая,
омраченную душу мою светом Твоим, яже Свет
рождшая Един Ипостасный.

Песнь 5

Ирмос: Света Подателю:

На Древе Простершемуся волею подобяся, Егоже
милосердию подражая, Евангельски молил еси:
Отче Благий, ихже дал еси мне, сохрани, да
никтоже от них погибе.

Смиряся оскорбляемь, темницы и изгнания
горечь претерпел еси, темже блаженную улучил

еси, многострадальне, славу и светлость.
Душа твоя крепкая козни вражеская низложи,
мрак неверия и лукавствия разгнася
твердейшею верою твоею, Прокопие всехвальне,
архиереев похвало.

Богородичен: Иже образ Ипостаси Отчи, из
Тебе прият смешение Богородительнице, и
истлевший образ прослави, и сего нова сотвори.

Песнь 6

Ирмос: В бездне греховней:

Падшаго естества возношение, Духом
укрепляемь, поправ, мужественно облекся еси
багряницею нетления, Прокопие
священномучениче: темже прославляемь Ангелы
и человеки.

Кровию страдания, блаженне, освятил еси
землю, духом же на Небеса возшед,
присовокупися гласу святых новомучеников,
воспевающих Святую Троицу.

Молитва святя души твоя приятна бысть, яко
кадило, отче: в воню благоухания духовнаго,
Возсиявшаго от Девы исповедуя.

Богородичен: Вземлющаго грехи всего мира,
Христа заченши, Пречистая, не престай
просящи грехов прощения воспевающим Тя.

Кондак, глас 4

Во святителех благочестно пожив,/ и мучения
путь прошед,/ безбожия силу побеждая,/
поборник быв Херсонстей пастве, богомудре./
Темже тя почитающе, тако вопием/: от бед
избави нас присно твоими мольбами,/ отче
священномучениче Прокопие.

Икос

К высшему подвигу мученичества устремися,
Прокопие преславне, яко всеожжение
Божественное и жертва живая принесся еси
Спасу всех. Темже вопием ти: Радуйся,
исповедническаго подвига сияние прославивый;
радуйся, мученический крест во дни гонений на
Церковь избравый. Радуйся, Христа
распинаемаго паче жизни временныя
возлюбивый; радуйся, темницу, страдания и
смерть за Него претерпевый. Радуйся, паству
Христову, вверенную тебе, от расхищения
соблюдый; радуйся, и во изгнании сирых чад
твоих не оставивый, пламенною молитвою от
звероуловления тех оградив. Радуйся, со иереем
Иоанном за веру Христову и смерть приявый.
Радуйся, теплый предстателю наш пред Богом,
отче священномучениче Прокопие.

Песнь 7

Ирмос: Образу златому:

Не поклонився, священномучениче, делом рук беззаконных, претерпе поношения, и заточение, и раны, чистоту веры Православныя непоколебимо исповедал еси.

Святых жития не токмо умом познавати учил еси, житием бо твоим и деяньми тех подвиги проповедуя, Божественным разумом души пасомых просвети.

Глагол твоих вещание и святоотеческих преданий сила обтече, богодухновенне отче, землю Русскую, иссохшую от зноя гонений и нечестия, напаяя сию Божественною благодатию.

Богородичен: Радосте скорбящих и отчаянных, Ты еси Мати Преблагая, Спаса рождающая рода нашего.

Песнь 8

Ирмос: В пещь огненную:

Ни темница, ни ярость мучителей, ни страдания, ни даже смерть не возмогли разлучити тя от любви Божия, но тою укрепляясь, воспевал еси: благословен Бог отец наших.

Возмогл еси Божию вседетельною силою богоборческия прелести вселукавое мудрование, страсотерпче, победити, и венец нетленный от всех Владыки прияти, поя: благословен Бог отец наших.

Воистину блажен ты, Прокопие многострадальне, ибо сподобился еси соделатися общником страстей Христовых, себе самага в дар Зиждителю принося, вопиял еси: благословен Бог отец наших.

Богородичен: Столп крепости тверд, и Хранительницу, и Заступницу стяжавше Тя верою поющи: благословен Бог отец наших.

Песнь 9

Ирмос: От Бога Бога Слова:

Возвышен явился еси страдании честными, приял еси венцы победы, священномучениче, и ныне в лике новомученик и исповедник Русских предстояще Божественному Престолу, радуешься вечною радостию.

Наставниче и молитвениче наш, отче Прокопие, со иереем Иоанном, сподвижником твоим, и новомученики прииди, стани с нами; днесь бо празднуем честную память вашу. Верою просящия тя спасай от всякия беды, Прокопие блаженне, во Отчествии Небеснем

пребываеши бо присно, яко мученик непобедим.
Богородичен: Ты Единая Богу всяческая
мудростию создавшему, Мати позналася еси
Неискусобрачная, Дево Пречистая. Темже Тя
Ангели и человецы песньми величают.

Светилен:

Одежды твоя, Прокопие досточудне, кровию
обagriшася, страданием светло просветися лик
твой, темже Христос венцем мученическим
увенча тя.

Слава, и ныне, Богородичен:

О Тебе мы хвалимся, Богородительнице,/ и к
Богу Тя имамы Предстательство,/ прости руку
Твою неборимую/ и сокруши враги Церкви
Русския.

На хвалитех, стихиры на 4, глас 4:

Отче всеумдре Прокопие,/ сквозе бурю
безумнаго неистовства / к тихому пристанищу
таинств церковных / всепобеждающею
Божественною силою / Христово стадо,
вверенное ти, направил еси./ Темже
воспевающе, молим тя:/ помози и нам не
погибнути / во страстей пучине.
Кто изглаголет страдания твоя,/ егда виде
Церковь Святую попираему,/ чада же ея

расхищаемии,/ тогда яко светильник
Божественный и подражатель святых, / на
крове проповеда,/ еже слыша в сердце Духу
глаголему;/ страдальческое избрал еси житие,/
священства одежду обагрив кровию,/ мучениче
непобедиме Прокопие.
Предстателю Церкви Русския,/
священномучениче Прокопие всехвальне,/ выну
зряй Лице Господа на Небесех,/ не презри ни
единого/ от малых чад ея,/ но радостно
покаяние наше прими/ и моли присно/
сыновом русским спастися.

Слава, глас 8:

Срадуйтеся нам Ангельския чины и святии вси,/
днесь бо празднуем память священномученика
Прокопия,/ кровию Царствия вечнаго
достигшаго,/ веруем, яко духом вкупе с нами
пребывая,/ моление сие примет и Христу
принесет,/ ходатайствуя о спасении нашем.

И ныне, глас тойже:

О, преславнаго чудесе!/ Небесе и земли
Царица,/ от святых сродников наших
умоляемая, до ныне землю Русскую покрывает/
и лика Своего изображении милостиво
обогащает./ О Владычице Державная!/ Не
престани и на будущее время/ во утверждение

на Руси Православия/ милости и чудеса
изливати до века. Аминь.

НА ЛИТУРГИИ

Прокимен, глас **7:**

Честна пред Господем/ смерть преподобных Его.

Стих: Что воздам Господеви о всех, яже воздаде
ми.

Апостол, к **Римляном,** зачало **99**

Аллилуия, глас **6:**

вященницы Твои облекутся в правду и
преподобнии Твои возрадуются.

Стих: Бог нам прибежище и сила, Помощник в
скорбех, обретших ны зело.

Евангелие, от **Луки,** зачало **106.**

Причастен:

В память вечную будет праведник.

